

Kalaallit Nunaanni Namminersorlutik Oqartussat suliassaqarfinnik tiguserannut atatillugu sulisoqarnermut tunngasutigut apeqqutit aalajangersimasut pillugit inatsit

UAGUT MARGRETHE AAPPAAT, Guutip Saammaanneranik Danmarkip Dronningia, imaaliorpugut:

Folketingip inatsit manna akueraa aamma Uagut akuersinitsigut aalajangersarpaa:

§ 1. Inatsit atuutissaaq Kalaallit Nunaanni Namminersorlutik Oqartussat suliassaqarfinnik Kalaallit Nunaanni Namminersorlutik Oqartussat pillugit inatsit malillugu tiguserannut atatillugu.

§ 2. Kalaallit Nunaanni Namminersorlutik Oqartussat tigussavaat sulisut tjenestemanditut atorfiluunngitsut, Kalaallit Nunaanni Namminersorlutik Oqartussat suliassaqarfimmik tiguserisa nalaani qallunaat Kalaallit Nunaanni pisortaqarfiani suliassaqarfimmi pineqartumi sulisuusut.

Imm. 2. Kalaallit Nunaanni Namminersorlutik Oqartussat qularnaassavaat pisussaaffiit piginnaatitaaffiillu, sullivimmik nuussinermi sulinermik inuussutissarsiutillit inatsisitigut inissisimaffiat pillugu inatsisip malitsigisai, nuussinermut imm. 1-imi taaneqartumut atatillugu taamatulli atuutsinneqarnissaat.

Imm. 3. Ministerip susassaqartup Kalaallit Nunaanni Namminersorlutik Oqartussat isumaqatiginiareerlugit aalajangersinnaavaa, imm. 1 aamma 2 sulisunut atorfinni erseqqinnerusunik taasani atorfeqartitanut atuutissanngitsut.

§ 3. Inatsit atortuulissaaq ulloq 21. juni 2009.

§ 4. Naalagaaffiup Kalaallit Nunaanni tjenestemandii pillugit inatsimmi, tak. inatsimmik nalunaarut nr. 574, 5. august 1991-imeersoq, allanngortinneqartoq inatsimmi nr. 365-imi 2. juni 1999-imeersumi § 4-kkut, inatsisikkut nr. 1264-ikkut 20. december 2000-imeersuklut, inatsimmi nr. 1426-mi 22. december 2004-meersumi § 1-ikkut aamma inatsimmi nr. 249-mi 31. marts 2009-meersumi § 1-ikkut, makkuninnga allannguisoqarpoq:

1. § 13 a-mi imm. 5-ip kingornanut immikkoortutut nutaatut ilanngunneqassaaq:

”Imm. 6. Ministerip susassaqartup Kalaallit Nunaanni Namminersorlutik Oqartussat isumaqatiginiareerlugit aalajangersinnaavaa, imm. 2-5 sulisunut atorfinni erseqqinnerusunik taasani atorfeqartitanut atuutissanngitsut.”

Imm. 6 matuma kingorna imm. 7-inngussaaq.

2. § 41-mi imm.2-p kingornanut immikkoortutut nutaatut ilanngunneqassaaq:

”Imm. 3. Kalaallit Nunaanni pisortat oqartussaataat susassaqartut aningaasaqarnermut ministerip erseqqinnerusumik aalajangiinera malillugu isumaqatigiissusiorsinnaapput tjenestemandit atorfinitsitaanermi atugassarititaannut tunngasunik, taakkua § 13 a, imm. 2 naapertorlugi kalaallit pisortaqarfiini suliinnaraluarlutik taamaattoq qallunaat pisortaqarfiani susassaqartumi atorfeqarnerminnik ingerlatsiinnassapput.”

Imm. 3 matuma kingorna imm. 4-nngussaaq.

3. § 41, imm. 3-mi, imm. 4-nngortussami, ”imm. 1 aamma 2” allanngortinneqassaaq imatut: ”imm. 1-3”.

Christiansborg Slot-imi tunniunneqarpoq, ulloq 12. juni 2009

Kunngiussutitsinnik Atsiorpugut Naqissusiillutalu

MARGRETHE R.

/Claus Hjort Frederiksen